

四庫全書

集部

欽定四庫全書

五百家播芳大全文粹卷八十二

宋 魏齊賢

葉 棻同輯

疏

追薦

祖父忌辰道場疏

黃魯直

昔嘗逮事荷欲報之劬勞今屬諱辰感至哀於冥漠式



陳淨供少助善緣恭對皇覺表白愚悃

祖父忌辰齋僧疏

葛謙白

業鍾黑白各招果報之殊供及緇黃必獲超升之福仰
憑二教追泐一靈先公特進伏願頓悟上乘長棲道蔭
法空五蘊譴罷三官聞圓音於五毫之前受祕籙於瓊
章之上佛土三千界親禮世雄玉京十二樓徧游仙境
祖母忌辰道場疏

朝夕寢門雖不逮事綢繆牖戶燕我後生適當屬續之

長深動降霜之感敬依梵刹延飯衆僧冀此妙因倘為冥助

祖母忌辰道場疏

昔嘗逮事早纏風樹之悲尚憶分甘莫致冰魚之養式逢諱日更切哀誠爰集苾芻之僧躬設伊蒲之饌冀憑慈力仰助超升伏願不昧本來承茲法施

祖母忌辰道場疏

瓜瓞有綿永感夫人之德風枝不靜實惟先君之思爰屬

諱辰式追冥福恭惟大覺證知

薦考君設水陸疏

如來觀曠野之人嘗懷悲濟之念祖師當面壁之後遂
開拯拔之科三檀之施既泪於廣筵十習之愆必消於
幽趣先考特進遽辭昭代奄屆小祥痛惟罔極之恩爰
投無遮之會歸依薩婆若廣誦修多羅以伽陀之會而
施苾芻多之倫以蘇摩之燈而燭皎魔羅之界恩霑有
頂法被無邊庶仗薦嚴上茲英爽先考特進伏願得柔

順忍具智證通罪垢消除如風中之沙聚性真明悟若
掌上之庵魔以五根五力之殊因證三耶三善之妙覺

薦考君懺大藏經疏

如來四十九年茲每興於五濁大藏五千餘卷法備演
於三乘惟炎漢譯於摩騰洎大唐廣翻於玄奘道宏震
旦教接迦惟釐為經律論之文大滅貪嗔癡之毒魔軍
敗北信士指南皎如暗世之燈明濟若巨川之船棹某
纏哀陟岵歸命世雄爰親閱於琅函若面承於金口願

憑妙剌式薦尊靈先考特進伏願絕邪見之稠林離三
有之窟宅蠲除業障報障煩惱障安住業根信根精進根觀
史天中速覲九廊之院安養國內坐臨七寶之池

皇考朝請忌辰道場疏

黃魯直

二親之年如白駒之馳過隙百身以報如一滴之益滄
溟罔極之恩永思甚痛式當諱日恭設妙因倘成不二
之音咸開頓覺之路仰惟功德證知

薦考君書維摩楞伽金光明觀世音經疏

黃魯直

天乘梵乘欲頓超於法界筆施墨施可追助於冥塗而况談盡不盡於毘耶之地說俱不俱於楞迦之嶺信相演偈於金鼓無盡施法於寶珠皆為法藏之祕文實亦如來之了義虔書梵虔獲福河沙先考特進伏願避六賊之林射四諦之的絕攀緣於驕幢幻葉期超度於法棧慈航正語正業之道支速能證入無量無邊之佛土
自下超升

薦考君道場疏

葛謙白

禮制有盡喪畢三年孝念無窮血霑九地昊天罔極夫
復何言恭聞諸佛示慈悲心行方便路宵開萬字擔度
四生不以禮薄不足以藹馨香不以人微不足以感高
厚憫茲荼毒與作津梁倘使滯魄凝魂得乘威光慧力
回向初地不入塵流某也雖不能謝德於無私亦安敢
忘情於不報

薦考君懺寶積經疏

葛謙白

迦文千百億身雖玉毫之未覩寶積四十九會皆金口
之所宣爰歸命於竺墳肆親披於苔表冥資法力亟拯
幽塗先考待制伏願斷有漏緣破無明闇滅障如風中
沙聚見性如掌上菴摩覩如來微笑之光滅多生習氣
之重為尊為上為妙永依三耶菩提作舍作救作歸即
詣一生補處

薦考君大祥道場疏

邵公濟

元身已沒悵奄及於祥除令名益新既再蒙於褒贈永

念怙恃之德不酬覆載之恩惟茲勝峯近臨大墓祥光
所燭吉地可通躬即仁祠夙脩淨供近痛無父之國舊
悲見母之泉念孤苦之餘生宜委頓之末路未先犬馬
空難鳳麟追思先君子之平生當憑大菩薩之至鑒庶
冥福之可薦竭危懇之甚哀

薦考君飯僧疏

人生易失俄經六七之光陰佛慧難窮願照三千之世
界庶令英魄徑達上方恭惟先考通直才富班揚學追

孔孟蚤飛鷄表即馳譽於儒林晚奮鵬圖遂升華於仕
版潔已以進直道而行不為矯拂以沽名獨秉公忠而
報國一司邑尉宿姦皆逾境而去之四領縣章遠民有
負子而至者治聲籍甚士論藹然俄均逸於嵩山姑養
高於淮甸故懷詩酒方陪蓮社之清游脫屣形骸忽起
蓬山之歸興念壽考本無足恨顧追慕獨不能堪用傾
欲報之情仰薦無生之福某恩深鍾愛義急傳家處帝
學者半年妄希曾子之三釜距親闈者千里久稽何蕃

之一歸既辜晨昏視膳之心更廢疾病嘗藥之禮竟作
終天之別徒增叩地之悲幸如來是真皈依使過去得
大饒益雖善人何必多懺而哀懇由茲少伸伏願先考
通直乘此妙緣悟諸無相蓮花不着水長解脫於九幽
明鏡亦非臺自圓成於一性斯謂不亡之壽式寬罔極
之思

皇考忌辰水陸疏

三塗苦海由一念以沉淪千聖覺航極羣迷而濟度蓋

死生之大變隨罪福之所招故孝子慈孫捐百身而莫
贖非利眼上智墮衆惡以何知惟我先人早探真諦高
明不亂琅然易箒之言寡慾無邪允矣齋心之力光陰
迅駛諱日存臨願孺慕之如新痛仙遊之愈遠爰脩淨
供普薦含靈自九土之波翻積十年之雲擾或被堅執
銳筋力斃於封陲或斬將搴旗骨肉膏於原野孤忠莫
白幽魄誰依矧荒歉之相仍致流離之不保赤子棄置
於道路豈無惻隱之仁白首枕藉於溝渠寧有蓋藏之

望願依祕印來赴梵筵澡浴壞軀歸投正法從無始之
多劫息饑火之貪癡悟有生之皆空廓寬心於平等速
資懺拔永斷攀緣仗先君為導師亟趨兜率與諸人為
善友同證菩提雖所求者奢而所挾之至狹將所格者
廣實所持之至誠集此無邊之妙因少酬罔極之隆施
仰祈大覺俯賜證明

先妣忌辰道場疏

黃魯直

天地罔極初無報德之階日月不來每深濡露之感屬

當諱日更切哀摧爰以佛香普薰僧飯維九冥寂寞而
積善之慶在心推諸佛慈哀則止覺之門有路伏惟萬
德俯賜證知

薦母設齋道場疏

拔邪歸正回苦作甘援汨投於濁流變清涼於惱地是
諸佛之洪願也鏤膚戴德擢髮數恩感夫棘之甚勞嘆
蓼莪之罔報是人子之哀情也職居中饋業墮浮生况
茲有漏之軀動是無明之境則母親生之日也求免愆

尤肅羞蘋薦欲求懺悔祇啟具文資十善之津梁破三途之苦惱則母親今之死也以諸佛之供擔憫人子之哀情知生日之愆尤知死後之懺悔歷陳血懇仰瀆鑒知

請佛心和尚為亡妣說法疏

孤子某今日襄事啟靈石山佛心大和尚升法座為亡妣說一句偈言使幽冥有知得親覩佛面承佛音旨是某所以為人子者報答親生之萬一也

中元薦考妣道場疏

毛伯穎

生我劬勞罔極之恩曷報惟天陰騭予善之理弗渝故
我佛以入俗利生之慈垂奉先追遠之教當衆生休夏
之日實禮典嘗秋之時霜露既濡慨增永慕蘋蘩可薦
昭祀如存以真常微妙之文濟解脫超升之路恪遵梵
典恭設齋祠上以莊嚴諸聖於十方下以津濟含生於
六道庶憑願力追遠先靈伏冀內外宗親祖禰昭穆受
生樂國咸知先佛之言餘慶流宗永錫後昆之祉

薦母設羅漢齋疏

李去病

不忘付囑有大因緣廓六通之神悉知悉見出三昧之
定來赴來臨為我母之導師登諸佛之補處下單眷屬
咸契願心

孟蘭盆薦考妣疏

葛謙白

日月其徂永動劬勞之感霜露既降難忘悽愴之心輒
緣自恣之辰虔啟解懸之會以酥醃之味而供十方調
御以伊蒲之饌而延五戒桑門禮化佛之懺儀誦雨花

之祕咒香普薰於三界燈廣照於九幽叢此妙因用薦
冥福伏念悟無生之忍盡有漏之緣百生千生乃至億
生成滌性遮之障一地二地乃至十地漸趨正覺之門

孟蘭盆薦考妣疏

開除禁制實為大歡喜之辰升濟神明必仗解倒懸之
會輒伸誠悃仰叩覺慈伏念某稟賦孤孀早失怙恃低
徊仕路每興三釜之悲拯拔幽塗尤念一乘之薦特蠲
蒲供虔奉金容領鷲嶺之高流演魚山之雅頌哀茲福

利上薦尊靈伏願摧煩惱之山裂愛慾之網心疑頓釋
若解百壘之花中罪垢潛消如散八風之沙聚早生淨
土永脫塵緣

孟蘭盆薦考妣疏

孟蘭建會為一衆自恣之辰貝葉垂科寶二尊追福之
日輒憑梵侶仰叩覺慈伏願依最上乘悟無生忍業障
報障煩惱障罔不蠲除信根定根精進根普皆證入受
生補處得大總持誦蓼莪之章勞瘁敢忘於親德啟孟蘭

之會薦嚴恭仗於佛乘躬即寶祠用伸丹悃伏願領
後三義悟不二門薩婆若海中備聞法要波羅密字內
親覩佛光

薦考君懺華法嚴經疏

葛謙白

香水海中塵塵盡為佛土摩竭國內句句皆演真乘能
依菩薩之園林坐觀華嚴之境界先考待制伏願被精
進之甲冑拔生死之淤泥五根五力五覺支十行十住
十回向普皆證入頓致圓明悟毘盧之法身不待寶金

蓮綻受彌勒之祕記何須樓閣門開

薦考君著四大部經疏

竺乾遺教備演三乘寶藏疏文獨先四部爰肅寧於梵
侶俾持誦於真詮恭啟法筵別施僧次設桑門蒲塞之
饌焚此岸旃檀之香綜此殊休虔祈冥福先考待制伏
願聞第一義入不二門性業遮業則無不消融理障事
障則悉皆開悟由寶積之路早登涅槃之山乘般若若之
船坐入華嚴之界

薦考君懺涅槃經疏

娑婆雙樹迦文顯示於泥洹拘尸大城師利親承於付
囑雖金剛之身豈虧於堅固然玉毫之相稍悶於光明
宜憑最後之談用作將來之眼先考待制伏願會無為
之舍斷有漏之緣苦諦集滅道諦則無不證知常想我
樂靜想則普皆證入百俱眇劫常現無邊之身一刹
那門超生不動之國

薦先妣忌日親誦維摩楞伽金光明楞嚴圓覺

法華經疏

稱性宣揚義存貝葉悼先持誦福過河沙而况毘耶談不二之門楞伽演百八之句百劫衆惡懺悔入金鼓之聲一解六亡綰疊契草中之喻銷幻翳而顯本性之不動滅化城而知二乘之非真是皆法藏之祕文實亦如來之了義虔宣梵度用薦冥塗先妣魏國夫人伏願絕邪見之稠林離三有之窟宅安養國內坐臨七寶之池親史天中速到九廓之院

追薦考妣道場疏

李去病

父嚴遽棄愴已改於新年母慈大違痛又臨於諱日深
念恃怙之德實均覆載之恩顧不孝不肖之餘生負未
死未報之重責雖知已隔於幽顯尚求升濟乎神明恭
揚貝葉之文妙設伊蒲之供伏願先考脩撰先妣真寧
碩人初心不昧宿垢盡空直見佛於祇園不游魂於岱
岳再念某近臨大墓肇啟新祠稍治林泉粗興土木不
知忌諱或犯威靈雖妄作之過難逃而追遠之心可憫

欲陰譴之獲免賴聖力以無邊柏茂松深天長地久靜
寐已安於丘壟高名永播於古今盡力哀誠仰憑至鑒

薦亡妻淑人水陸疏

孫仲益

伏以常住真心一塵不立妙莊嚴海五濁皆空是故諸
佛開衆生方便之門自然一念證無上菩提之路伏念
某亡妻淑人章氏十年好合憂患乖離萬里來歸死生
契濶屬臨諱日祇叩真乘弘宣多貝葉之文瞻禮青蓮
花之座龍天釋梵水陸空行游戲神通恭敬圍繞伏願

淑人章氏厭離火宅超悟三乘縮疊草中解除六結
後身了了畫沙之智已成曠劫冥冥觀河之見不昧

薦妻懺親誦華嚴經疏

葛謙白

依輪困十萬億刹實顯性宗訪知親一百十城俱談真
諦欲追影福爰效薰特亡妻安人樊氏伏願壞無明鈎
破隨眠甲視幻境如熱時之燄消業障如風中之沙莊
嚴閣前彈指親聞於彌勒蘇摩國內按頂常遇於文殊

介休縣君忌辰道場疏二首

黃魯直

穠如桃李鞠為松柏之陰淵有蘋蘩莫助豆籩之薦歲
將二紀哀念如新式以諱辰敬脩冥福顧平生之競與維
絕域而感通

江山阻長歲月徂謝塚上之木已拱室中之言未寒屬
當撤瑟之辰深念采蘋之助恭脩佛供用薦冥塗稽首
覺皇俯垂哀救

薦兄道場疏

入手功名凜凜平生之壯志回頭夢幻悠悠去國之孤

魂行闕秋風忽辭塵土故鄉明月空撫松楸一旦生違
百年死別念骨肉之恩莫報惟津梁之力可憑爰竭丹
棕仰皈皇覺夜臺寂寂幽明已隔於七旬法界恢恢煩
惱頓超於六道

嗣功十八弟推官舉哀疏

黃魯直

禮服之哀雖名初從兄弟之義不異同生孤苦相依夷
險一槩來問投荒之客書墨未乾追尋細席之言德音
猶在不謂禍成山岳痛割肺腑然以宿植善根已成道

種式筵淨土少助勝因陳法供於祇園演金文於貝葉
伏願嗣功十八弟推官最初一念不昧本來隨願世緣
還為骨肉歸依大覺為作證明

薦男請長老陞座疏

鄧志宏

幻體反空已失倚門之望潮音振地寧須建鼓之求蓋
禪悅之門不殊今古故游戲之際可度人天惟亡男歐
寧令尹紹業箕裘律身冰雪雖苦學志於附鳳而涉世
終於割鷄陶令徑歸雅有林泉之趣子文無愠何妨菲

萋之讒氣方屬於長虹身忽先於朝露欲追九泉之福
可無一滴之禪而等慈有大比丘土面灰頭初不落於
兔角拈花豎拂亦何與於卯毛盡吸西江均為法雨生
吞栗棘高視叢林願假妙音喚回英魄已脫南閻之苦
便躋兜率之游

薦女水陸疏

孫仲益

伏以死生之分定應同露雷之觀父子之情鍾尚懷駒
犢之愛仰憑十力俯薦一表伏念某亡女小師自天降

凶遭世罔極父罹大謗罪遷於嶺表母懼不測憂死於
蓐中以乳乳童孺八歲之餘而呱呱號慕三年之久
孤危極矣何恃而存疾病乘之遂殞其命念私門之降
戾致稚女之蒙辜歲行一周生還萬里不免水火永負
九原沈痛之冤示見神通獨仗諸佛慈悲哀之救是用集
桑門之勝侶演秘藏之真乘洞然無藏之燈彌滿衆
香之鉢海潮殷地花雨翳空升濟幽明歸依佛祖伏願
亡女洗心償一念之債彈指斷三生之緣降伏衆魔滅

除諸障觀一切有為之法悟四大無常之身普同有情
俱證無漏

薦李氏女水陸疏

孫仲益

伏以衆生造十習因受無量苦諸佛證三摩地示大悲
心一指彈而沙界已周五體投而應身出現仰伸弘願
俯罄一哀伏念某人六妄所纏十生相續屬免身之彌
月忽遇疾而暴亡四大無常百藥莫救恍如一夢已隔
九泉念茲嚙臂之初莫捄投車之痛是用皈依寶王刹

稽首大法輪發意圓成佇佛求應千燈普現八鏡交光
五色摩泥照濁水之源百寶蓮花雨娑婆之界伏願悟
三生之宿障洗曠劫之塵勞破煩惱濁為解脫門斷生
死根為菩提種滅諸國土障見自在天身如來會中作
法王子三千世界十二類生同躋極樂之方共獲逍遙
之果

舅母十三子君舉哀疏

黃魯直

從學外家早蒙慈誨竊身裔土孤奉至恩拜書墨之

未乾忽訃音之來及瞻雲萬里空盡於一哀報德九冥
恭投於三寶伏惟大覺證明

薦秦國夫人道場疏二首

歐陽永叔

淑懿之質已賁追榮之典陰幽之助仍資衆善之因爰
即華林載陳法供冀慈仁之遠被均勝利於無窮乘此
妙緣超升福果

覺慈廣被兼濟於含生冥福所資必憑於慧力惟懿柔
之秉德享壽考而有終隆睿眷以不忘集勝緣而增備

願乘妙道超薦真乘

追薦請長老升座疏

開闢已降惟佛獨尊供養之中以法為勝莊嚴此座祈
為讚揚行解如師方堪舉唱潮音一吐沙界咸聞倘神
識之有知庶輪回之不滯

追薦請長老升座疏

金甌浮雪玉篆團雲麪密奉珍蘋繫薦德以種種供養
某所能也進禪說羞具法喜膳香浮乳酪味過醍醐以般

若供養某所不能也蓋聞某師宗通說通我利人利以
三昧口舌作六道津梁聲動人天恩滋存歿

追薦講圓覺經疏

邵公濟

四大分離誰為和合三世平等本無去來伏冀滅空翳
花了幻垢相依清淨願力了增上妙心永斷輪回往大
圓覺已向眼光落時薦取豈待葛膝髻頭方知普使一
切衆生同證不讓法性

追薦設八菩薩道場疏

韓子蒼

有終有始雖令古委化之常惟孝惟慈乃子母無窮之
義况追感之無地而永別以終天表哀痛心必皈依佛
是用兩夕薰修之勝會修八菩薩之道場伏願彌勒指
南普賢灌頂地藏處堅固地觀音發微妙音生生妙吉
祥念念除業障虛空藏破開業力金剛手遮護凡情乘
此大緣永歸妙果愆子孫之順孝保門戶以亨昌凡厥
有情同沾勝利

追薦道場疏

汪彥章

伏以即水成漚起滅孰為自性將花覓果因緣悉是無
明蓋圓通一了則觸境皆真取執二途則無方不得况
履六塵之搖奪妄隨四大以拘纏現前而互別羣機究
境而本無一物出沒死生之苦海生成煩惱之癡根月
以指標詎可指端而認月跡因空有云何跡以忘空若
非法力之宣揚誰識心源之解脫是佛慈悲之勝力隨
人方便以開權伏念某人慧性夙明真詮冥契昔時鷲
嶺同為聽法之人今日龍宮偶墮無男之數自返涅槃

之趣俄興寔空之衰雖多生分段之何常然善眷攀緣
之罔極是用前瞻瑞相恭啟琅函乘微笑而演圓音說
大乘而專滿字願託人天之調御長陪帝釋之遨遊於
彈指頃而超過十方於刹那間而普知三世維摩室內
頓憑燈相以回心舍利緣中速轉女身而證道

追薦師友 尊官

追薦東坡先生疏

李方叔

端明尚書德尊一代名滿五朝道大不容才高為累惟

行能之蓋世致忌媚之為仇久蹭蹬於禁林不遇故去
遂飄零於障海卒老於行方幸賜環忽聞亡鑑識與不
識罔不盡傷聞所未聞吾將安做皇天后土知一生忠
義之心名山大川還千古英靈之氣繫斯文之興廢占
吾道之盛衰茲乃公議之共憂非獨門人之私義所恨
一違師席九易歲華意徒生還遂為死別慕子貢築場
之意每罄哀誠誦普賢行願之文庶資冥福阿僧祇劫
為轉法輪兜率陀天頓居福地仰祈諸聖俯鑒微情

追薦秦太師齋僧疏

濟世出世圓機蓋本全提捨生受生游戲不妨自在要
知無上妙用當屬沒量大人恭惟太師申王愍海懸百
戰之難起石室三昧之定出赤子於兵火置之清凉立
皇基於金湯屹然鞏固既畢濟於悲願乃復歸於淨方
彼時此時初無差別前佛後佛皆我導師尚不忘於津
梁俾悉趨於覺路

追薦曾丞相疏

毛伯穎

人之云亡時既傷於殄瘁士為知己義不負於幽明故
相黃公披禍亂以立朝廷薦賢才而報人主功虧一篲
恨徒積於重泉難贖百身墳已荒於百草山川攸遠歲
月眇徂永懷夙昔之音容誰主春秋之祭祀邱墟東閣
空嘆彈鋏之聲慟哭西州莫致生芻之奠屬此中元之
日聊伸下客之情憑仗佛乘資薦冥路伏願聰明徇達
之性不昧本來清淨莊嚴之鄉早登解脫法界海惠猶
如虛空世世生生相為善友

追薦席大資疏

高山仰止方勤模範之依梁柱推乎忽報光靈之殞歎
斯文之將墜悼知己之難逢江海脩塗訃音遠至衣冠
清儀悲憤同聲天道難謀百身何贖撫棺一慟奔馳難
造於几筵築室三年封植未知於丘壟興言及此墮淚
何勝惟憑西竺之淨緣仰薦東維之逝魄歿故叅政大
資相公伏願本來道學不時死生夢寐可占猶識衛公
之精爽山丘所歷還同謝傳之生存證鄉真乘超登覺

路一彈指頃徧慈氏樓閣之游正法眼中入普賢行願
之海

追薦秦少游疏

蘇子瞻

生前莫逆蓋緣氣合而類同死獨未忘將見情鍾而禮
具伏為歿故少游秦君學士早雖穎茂觸事遭迍晚向
仕途方霑祿養未厭北堂之懽樂遽逢南海之播遷頓
足牽衣哭妻孥於道左含酸吐苦願鄉國於淮壖首尾
八年憂驚百變同時逐客膺大需而盡復中原唯子莫

年厄終窮而歿於瘴域林泉夜夢猶疑杖屨之竝游風
月扁舟尚想江湖之共泛追傷何補焚誦乃功庶仗真
詮埽除夙障而况真源了了素已悟於本心淨目昭昭
無復加於妄翳便可神游淨土岸到菩提永依諸上善
人常住無所邊地

追薦馮大學疏

李去病

伏以鄉間晚輩每望先生之後塵詩禮衰門豈有孺子
之可教辱知辱愛愈久愈新念臭味之偶同譬諸草木

而蹤跡之相避動如參商夢寐常勤於寸心寒溫久廢
於尺紙以一介煙沉之舊當衆人趨附之初媿無因以
得前安所恃而自棄三薰三沐方圖晚節之歸一死一
生已抱窮天之恨式陳淨供仰薦冥游既宿植於善根
想益堅於願力諸妙樓閣早伺彌勒之登九品蓮花永
受慈尊之記

追薦邵先生疏

毛伯穎

築室三年悼光靈之寢遠生芻一束慨精爽之如存敢


卷八十二
集秘言少資冥路某官文章爾雅德義可尊沉魄浮魂
當作山川之綱紀格言善行蔚為老成之典刑壽考歸
全哀榮無憾願垂歆答早遂超升垂裕後昆克保章平
之繼世鑒臨知舊永為孔李之通家

追薦知命百日疏

黃魯直

脊鴿在原汝有急難之義虎兇出柙我無保惠之功書
墨未乾訃音來即水火不免將何面以見先親股肱或
虧念誰依而終晚歲逮此卒哭幾於無生躬掃秘園親

供緇侶冀憑大覺之力少慰九冥之思稽首慈尊惟
垂悲救



五百家播芳大全文粹卷八十二

欽定四庫全書

集部

五百家播芳大全文粹卷八十三

詳校官侍郎臣劉躍雲

助教臣常循覆勘

總校官編修臣王燕緒

校對官中書臣范 鏊

謄錄監生臣徐秉文

謄錄監生臣莫與儔

欽定四庫全書

五百家播芳大全文粹卷八十三

宋 魏齊賢

葉 茶同輯

祝文

國家祈禱祭祀

明堂大禮冊文

汪彥章

昊天上帝

嗣天子臣某敢昭告於昊天上帝伏以明明在上臨照
四方惟我邦家夙膺景命世脩禋類猥及冲人祇見合
宮敢忘其舊謹以玉帛犧齊粢盛庶品肅恭禋祀式展
誠欽太祖啟運立極英武睿文神德聖功至明大孝皇
帝太宗至仁應道神功聖德文武睿烈大明廣孝皇帝
配神作主尚饗

皇地示

伏以肇禋明堂享帝之盛於赫厚載與天同尊二儀合

祛厥有常典敢罄齋栗用祈顧歆謹以玉帛犧齊菜盛
庶品肅恭禋祀式展誠欽太祖啟運立極英武睿文神
德聖功至明大孝皇帝太宗至仁應道神功聖德文武
睿烈大明廣孝皇帝配神作主尚饗

太祖太宗

伏以於皇祖宗肇有四海陟配上帝百年於茲眇然冲
人嗣主茲祭報以崇極舊章敢忘謹以制幣犧齊菜盛
肅恭明薦侑神作主尚饗

太廟

伏以維德不類嗣承明禋乃涓剛辰祇見上帝燕及崇
祐垂休亡窮謹以嘉玉量幣柔毛剛鬣明粢薌合薌其
嘉蔬嘉薦清酌式陳明薦尚饗

明堂大禮奏告諸陵宗廟祝文

汪彥章

伏以自項郊見復茲歲臨將擇季秋之辰恭惟重屋之
祝

明堂大禮奏告太祖太宗祝文

汪彥章

伏以比涓剛日恭致嚴禋昭五室之祲容輯兩朝之靈
貺禮有登配神所顧歆爰殫孝享式舉累朝之典不
敢不告

大禮畢恭謝景靈宮諸殿神御祝文

汪彥章

伏以比即崇筵具陳嘉玉幸高穹之顧答知景祚之靈
長坐格熙成寶詒燕翼敢懋菲涼之質永承錫羨之休
改元奏告天地社稷諸宮觀祝文

汪彥章

比以薦更大故思靖羣生乃即履端之辰博稽居止之
義疏恩肆青易號冠元尚祈降鑒之明克集係隆之慶

太后受冊祭告祝文

蘇子瞻

祇事親闈庶幾考治配德祖考既務極於推崇篤生眇
冲亦敢忘於褒顯將奉寶冊率循舊章涓日甚良先期
已告

公主下嫁祭告祝文

汪彥章

天屬至親王姬貴胄爰卜國婚之吉茲逢后族之良車
服有輝將成夫婦之教著龜咸喜爰知祖宗之心謹以
以良辰申茲吉禮

大明祝文

葛謙白

惟帝神龍感孚瑞火名官斷揉之功垂憲億代今歲將
道盡聚物蒙享其敢乏先農之祀

后稷氏祝文

葛謙白

惟帝神武赫靈覃訏稟質教民粒食民以弗飢月臨嘉

平土反其宅司嗇之祀敢効吉蠲

歲星祝文

葛謙白

惟神著象圓清騰光下土安靜中度為時之祥赤黃而
沉農危告念國有儲峙翳神之休

脩前殿告祭祝文

歐陽永叔

神游所格秘寢有嚴役事時興方勤於締葺后祇安靜
頗懼於震驚菲薦式陳明靈昭鑒

繕治禁河祭告河神祝文

天子以別都之重原廟之嚴而宮闕未崇制度多畧既
敕有司以時繕治矣然山高谷深水所不至故園囿池
沼之大灌溉滌濯之用綆挽在汲不足以濟乃者吏嘗
架河膚引金水屢作雨輟績用弗成今奉詔旨疏渠於
七里之川役不淹時功用克立謹涓元日達此新溝惟
神之靈實相帝祉濟道之始敢不昭告

太一宮脩殿祭告祝文

蘇子瞻

於穆祠宮有嚴春祀吏以時而按視工揆日以脩完庶

就潔新永綏靈御仰祈昭鑒大庇含生

洛陽天津橋導水祝文

竹隱畸士

洛陽天子之別都宮闕在焉而馳道之衝梁毀弗治吏
既失職民以病涉某實奉詔典司役事屬徒數方興作
累月而雨潦弗作癘疾莫興是神之有大賜於茲役也
今梁既克建工用告成謹導大川於此穀旦伏願沛然
就下陰賜護持顯揚善利之靈祇若大君之命亦有幣
帛粢盛以永事神不怠

洛陽天津橋成導水祭神妃祝文

竹隱畸士

自江河淮濟以達於海凡水暨之所神輒董司之朝廷所以屢進封爵而褒顯神之功德者可謂備至矣豈不
以利澤之及於物者廣且博於今洛水貫與西都而天津之梁跨立其上工既成矣方將導川而東之吏則不
敏弗能稱職意者非神之威靈有以陰相而默助之殆
且莫之託也敢涓告辰先事以吉維神降格實顧歆之

太廟繕治祭告祝文

蘇子由

廟室久安霖雨乘隙飭工繕治運日告虔棟宇益堅威
靈無疎

繕治禁河祭告河神祝文

竹隱畸士

洛川之陽芒山之麓宮闕在焉地既積高水則弗至而
苑囿池沼之大灌溉滌濯之用凡所以奉至尊共朝夕
者無所仰給吏用是懼之距城之七里實得美泉方將
繕治隄防溝而約之禁中此神之職所宜聞也凡事之

始不敢不告

景靈宮脩水渠祝文

蘇子由

靈宇邃嚴周渠捍密有司繕故以時易新既命涓辰敢告經始

脩諸壇祭告祝文

壇壝之嚴神明所格以時脩舊式叶彝儀涓此吉辰用申昭告

洛陽橋成導水祭洛神祝文

昔者禹得九疇肇自龜書周人定鼎卜惟洛食天下名山大川之神助國者蓋亦多矣然帝王之興洛輒預有符焉神實司之可謂盛矣今宮闕居其陽馳道出其上某奉詔旨為梁以濟賴神之休既克有成方且尊川而東之謹涓吉辰先事以告伏願弭節安行波恬不興毋作怒流以順帝命則神亦有無窮之聞顧不臆歟

上清宮成詔告諸廟祝文

蘇子瞻

上清儲祥宮成敷宥四海均福於下有詔守臣凡在秩

祀罔不祇薦惟神導和却冷保民無疆以稱朝廷至仁
之意

脩城門告祭祀文

宋子京

國塗南出城闔內嚴將屬煙燔稍加脩飾插壘丕集穿
築為傾仰冀靈休助竣役事

脩殿門告祭祀文

宋子京

比僂庶工聿新嚴闔日無淹久績乃雄成上棟有初擊
臯云息俾懷令薦以答潛休

陵山一路告祭祝文

揚大年

太宗皇帝龜洛開符龍輜戒道仰秦鑿之廟貌陳周禮
之樽彝用昭格於神明蓋聿脩於彝典恭惟正直俯鑒
吉蠲扁鵲祇宮典汾汾水登遐驅八翼以啟行屆雙鳩
之舊壤瞻龍顏其如在顧蚤輅以難留謹用苾芬以求
肸鬯凡井

脫屣人寰遺弓僂路爰屬因山之禮用脩假道之宜仰
惟窈窕之容俯鑒馨香之奠左夫人

鑄鼎功成夢齡數迫畢陌之茄簫載咽鮒魚之弓劍其
期式瞻廟食之靈恭展德馨之奠敬拔山神

厭世上僊因山啟卜儼塗芻而成列奉寔宥之有期爰

假道於嚴祠輒薦誠於薄酌

右夫人

龍鑣上漢鳳翥戒塗爰陳埽地之至誠周告拔山之英
魄仰惟如在俯鑒惟精

大力

飛名帝錄釋負人寰玄堂將塵於衣冠清祀式陳於醮
竿虔脩彝典俯鑒丹誠

五通

運屬冥升灾興夕駕祀國動崩天之戚橋山當復土之期式瞻西伯之嚴祠近在東周之舊壤恭陳清酌用告明神

周文王

攀髯不駐復斧云歸儼天仗以徐行指虹橋而徑度聿

陳薄酌用告明靈

金均

乘雲不返同軌有期儼龍馭以克行指虹梁而利涉聿

脩祀事式薦明誠

任店

安御容祝文

歐陽永叔

宗廟之禮是為典彝衣冠以游實有故事載嚴實構以奉威靈消吉月以有初庶真馭之斯格

遷御容祝文

蘇子由

終南積高神明是宅仙廟夙設容御攸存屬當圖新敢忘遷寓少祈安妥旋復故常

安御容祝文

歐陽永叔

雨水為灾殿塗增葺亦既新於叢構庶來復於真游爰揆靈長冀慈安妥緬為慈佑丕鑿乃誠

安御容祝文

蘇子瞻

於皇在天丕冒下土矧此山陵之近顧瞻兩都宅於嵩
洛之間上聳五聖有嚴淨宇祇奉睟容願追梵釋之游
永答人天之望

安御容祝文

蘇子瞻

唐虞稽古雖絕名言文武重光已新叢構下慰華夷之
望仰慕天日之容將住宅於靈宮永懷攀慕願少安於
秘殿庶盡瞻依

郊禮赦書告祭百神祝文

竹隱畸士

皇帝陛下親政之五年民人協和天地並况符璽自出
厲裁不興涓選元辰躬奉郊祀被甲子詔書凡郡國山
川百神之在令典者吏趨潔齋具薦嘉旨惟神顯德實
佑斯民其敢不虔肅致明祀益廣惠澤以稱我天子之
休命

德音告祭諸廟祝文

竹隱畸士

皇帝仁聖敬恭明神勤勞萬幾比爽和豫明詔惻怛惠

寬囚辜申命有司嚴舉祀事惟神胙國導迎喜氣佑我
元后亟臻平康俾我永永承事不怠神亦與有無窮之
休

登極赦告諸廟祝文

皇帝聖德克堪對天惟新陟王付畀重器初以冕服臨
見羣臣天人和同不約共慶被庚子詔書凡名山大川
與諸廟食之神勅吏以時咸秩祀事肆用諏日薦陳犧
牲神其燕歆相我后以永天之命

德音祈福祝文

天以聖母用綏定我國家今功業方凝內外禔福乃降
災疹以弗康於寢興皇帝孝恭肆用齋栗祇懼不愛牲
幣以徧請於羣神惟帝神降衷右我文母蠲去藥石咀
臻瘕瘳則惟帝神之靈其曷敢不報

北岳祈福祝文

惟我文母擁佑聖皇勤勞邦家功在社稷與於夙宵上
用祇懼勅遣守吏潔齋以祈願錫祉福亟臻平康俾我

聖皇共養不怠我亦以幣與牲俟帝休命

被詔告祭諸廟祝文

惟聖御極立愛惟親明靈所依罔不欽奉肇造寶宇以
寧列聖之神祖宗顧懷報以景福明詔祇栗弗敢以專
申命有司咸秩祀事具薦豐潔神其鑒之

赦後祭告諸廟祝文

蘇叔黨

恭惟主上欽崇天道敷佑下民躬薦薇稱以嚴上帝沛
鴻恩以率土秩元祀於百神乃眷明靈實參化育名紀

載籍功冒黎元冀昭鑒於德音益導迎於和氣均播厥
福永孚於休

日食祈禱祝文

蘇子瞻

嗚呼日官底日實昭天戒正陽之朔將有薄食上心震
懼側身脩德誕布休命赦宥多僻凡在祀典罔不咸秩
惟神聰明照鑒誠忱消復大肯迎導和氣俾我有邦享
天之衆民皆康阜以永保神之休無斃

星變祈禱祝文

邵澤民

今天子嚴恭寅畏奉若天道邇者星文變異實軫聖心
乃下哀痛之詔出罪已之言澤及萬方以格天之明命
又俾郡邑使凡秩於典祀之神咸往告焉惟神聰明正
直同國休戚其導迎和氣消彌妖祥慰我天子厥報無
爽

赦後省賽祝文

秦少游

祇奉綸音徧脩羣祀導迎善氣加惠元元敢不恭進酒
牲備嚴薦獻以承休命神其鑒之

德音改元祭告祝文

毛伯穎

皇矣上帝方隆申命之符古之明王咸有禦災之術恭
惟睿主再造宏基將祇迓於天休廼載新於年紀赦過
宥罪而與民更始潔粢豐盛而靡神不宗惟爾明靈享
茲信順五兵不試盡消寇竊之憂百穀用成茂介烝黎
之福

赦後祭郡神文

真主紹統覃慶萬方若時明神悉均渥澤神其顧享密

相皇家使四夷咸賓盜賊不作年穀屢登則豈特斯人之幸雖神之祀亦將與國無窮神之聽之母辱君賜

赦後祭郡神文

來復一陽郊見天地晏溫登霽盛節用成若時百靈寶
燕寶相四均渥澤並舉常祠神其顧歆益揚乃職佐佑
萬乘永孚王室之休無負聖君之寵

生皇太子祭郡神文

炎宋中興本支百世若時元子育慶椒塗爰沛湛恩誕

均幽顯惟神陰相簡在帝心牲醴必芬庸示昭報神其
欽止勿替前休

出師告廟祝文

邵公濟

強敵怙強違天逆理窮兵六月流毒四方某備位戎司
義當報國蓋敵加而後應冀師出而有功伏願神聰俯
垂陰佑用克彰於靈應俾盡掃於妖氛倘遂感通敢忘
報事

獲賊告裕陵祝文

蘇子瞻

大獮獲擒必有指蹤之自豐年高廩孰知耘耔之勞悍
彼西戎古稱右臂自嘉祐未木征擾邊至熙寧中薰羶
方命於赫聖考恭行天誅非貪尺寸之疆蓋為民除蟲
賊遂建長久之策不以賊遺子孫而西番首領鬼章首
犯南川北連拓拔申命諸將擇利而行旋聞偏師無往
不克吏士用命爭酬未報之恩聖靈在天難逃不漏之
網已於八月戊戌生獲鬼章頡利成擒初無渭水之恥
郵支授首聊報谷吉之寃謹當推本聖心益脩戎畧務

在服近而未遠期於偃草以息民仰冀威靈曲垂昭鑒
謁宣聖

祭饗 辭

謁宣聖祝文

張敬夫

某以愚陋被命臨民早夜恐懼未知所濟惟當精思聖
經之法言體而行之庶幾萬有一獲寡於罪悔視事之
始敢祇見於學宮

新學落成祭先聖祝文

伏惟廟學新成謹率僚吏與鄉之士行釋菜禮敢不稽首再拜思所以祇告明訓

奉安先聖祝文

茲新棟宇亦既告成敬奉神像即安於宮敢告

謁先聖祝文

某恭承皇命來守遐藩視事之初祇見於廟為政之方備嚴經訓雖曰不敏敢不夙夜敬思力行庶幾萬一

謁先聖先師祝文

某以承學濫茲為邦視事之初祇見於廟佩居敬行簡
之言推學道愛人之志雖曰不敏敢不夙夜庶幾萬一

祭先師祝文

伏以廟學新成謹率僚吏與鄉之士釋菜於先聖敢以
先師鄒克國公配

辭先聖祝文

竹隱畸士

某猥以諸生攝官承乏政也無良而歲則大有獲免罪
戾適及期年蒙恩還朝其敢不告

謁先聖祝文

秦少游

惟王道備天人功崇列聖大成既集六藝期明內聖外
王所同憲法山川鳥獸形亦裕如萬世尊親天下通祀
惟時士子生逢休命讀玩棄餘作為藝業有司論定天
澤遂卑推本所從實王芘貺敢涓時日薦見朝廷

謁先聖祝文

秦少游

羣守被命於朝既至治所則必告於境內之明神禮也
矧惟先聖實我儒祖薦見之禮敢後羣祠是率僚屬爰

及士子躬趨於庭以執祀事

謁先師祝文

秦少游

惟公聖師所鑄號古哲人凜然高風聞者為起諸生敏
求不覺累年依憑餘光以得名官時方尚德進爵既崇
祭重報先敢忘大賜祠以薄饌公其鑒之

謁夫子廟祝文

趙德莊

古者有大政事必出於學今亡矣特以養士而已然羣
邑之吏始至者必先見於先聖先師越三日又見焉然

而退而從政示人有所本也某不佞而學徒也其敢叛去以不循其本尚饗

鄉飲釋奠夫子廟祝文

趙德莊

洪惟聖王丕闡文教揆時制禮有合於鄉校肆我附庸
欽率令典齒德在次爵洗在榮毋敢慢爭以瀆五行一
獻之禮因先厥誠

辭夫子廟祝文

趙德莊

某不佞獲從鄉大夫士釋菜奠飲於先聖先師之宮蓋

三春且秋矣內不及已外不及民先友漆雕開之所畏也而某蹈之雖幸而免其顛泚如朝聞夕死尚鞭其後敢昧以拜

辭學祝文

趙德莊

不量學力妄意為人名虛祿浮禍疾存作知難而去神鑒所臨尚抱遺經以全晚節

謁先聖祝文

趙德莊

歲比不登民食二鬴天子憂之申命老臣以脩荒政惟

先聖有言不患寡而患不均不患貧而患不安某敢不
思所以均而安之者以無忘先聖之訓而奉天子之詔
其尚克鑒之

謁先聖祝文

葛謙白

某嘗聞之夫子曰君子學道則愛人未嘗不書諸紳也
今天子不以某不肖使藩於江城其敢不事茲語以施
於有政尚饗

謁先聖祝文

汪彥章

某奮自諸生蒙聖恩移守此土視事之初祇謁廟下擔
行所學以臨其民雖在軍旅敢廢俎豆尚饗

祭宣聖祝文

崔德符

宗周之晚道術既分諸子相騰邪說紛揉惟王德高將
聖道極大成煥焉垂世之書以作生民之範某摳衣詣
席早預諸生擁笏造朝晚登仕版介居江國亦領縣章
式謹彛儀肆陳薄奠

祭十哲祝文

崔德符

猗歟夫子道冠羣倫諸生三千周旋天下惟神或譽高
入室闕名著升堂卓然羣弟之間迥處十人之列被服
真儒之道優游名世之賢國有彝章歲脩祀事

祭兩廊諸子祝文

崔德符

在昔晚周異端並起翳我先聖闡揚道真維神或親見
於當年或相望於異世咸能服膺夫子之道高踐聖人
之門垂千百年著見方冊功存名義報有常典

謁先聖祝文

朱元晦

某早以諸生推擇為吏中遭疾病即退丘園乃得其耕
耨之餘日伏讀先聖先師之遺書夜思晝行不敢以昧
陋自棄者二十餘年於此矣蒙聖恩假守茲郡懇辭不
獲輿曳而來疇昔所聞庶幾小試蒲柳之質衰不待年
憤眊支離已深不夢之歎大懼弗稱以辱君師祇事之
初敢誠告惟先聖先師之靈實鑒其衷使幸不獲罪於
其民而蚤遂歸田里以終故業則某不勝幸甚

祭文宣王祝文

某誦先聖之言於百世之後尊先聖之道於千歲之前
志存於道紳書其言四惡惟屏五美是尊庶幾治政以
臨其民某叨受朝寄俾守方面祇見於學敢遵常典

辭文宣王祝文

某祇受朝命來守茲土誦夫子之言行夫子之道尊美
屏惡居敬行簡以施於政以臨其民知自勉而已茲緣
申命領計東南去此有日敢不致恭宇下伏惟尚饗

謁文宣王祝文

某本以諸生起家為吏蒙恩之誤承乏此邦既有民人
又有社稷學優則仕雖有愧於格言寬以愛民其敢忘
於聖訓蒞事之始敢不祇見

辭宣聖祝文

黃泰之

某少而知學以絺章繪句為餘習凡先聖之訓可推而
行者服念惟謹備員試郡他不遑務日孜孜於學道愛
人之規持之而固措之而宜政成寵加不敢以叨榮而
祇懼惟不負之學自此願益加勉焉

祭先聖祝文

王介甫

惟王之道內則鈔萬物而外則師王者為緒餘於一時而鼓舞於萬世學者範圍於覆幬之中而不足以酬高厚之德令與諸生釋奠而不敢後者茲學校之儀而興其所以愛禮之意也

祭先師祝文

王介甫

外物不足以動心而樂者可謂知性矣然後用舍之際始可以語命而三千之徒聖人獨以公預此所以學校

有釋菜之事而以公配享焉

五百家播芳大全文粹卷八十三

欽定四庫全書

五百家播芳大全文粹卷八十四

宋 魏齊賢

葉芬同輯

祝文

謁廟

謁諸廟祝文

張敬夫

某被天子命來守此邦靖共爾位正直是與願雖不敏

敢不敬斯言惟神實鑒臨之

謁社壇祝文

張敬夫

某恭承皇命來守遐藩視事之初祇見壇壝惟神克相
惠綏此民政有乖戾罰止某身

謁諸廟祝文

朱元晦

某抱病田間不堪為吏久矣聖天子哀憐不忍終棄強
畀符竹使為此邦輿曳而來亦既視事以衰眊罷軟之
資當民貧財匱之際大懼廣闕無以克當明恩惟神受職於

朝廷以食茲土其與命吏憂則惟均其亦有以相之使民安於
下官給於上而某也蚤得收其疾病之軀以歸老故丘則
神之賜大矣歎謁之初敢以誠告他不敢有所祈謹告

謁諸廟祝文

汪彥章

某奉天子命來殿此邦與神分職幽明均保疆域下車
之始敢以虔告惟神陰相之使枹鼓不鳴雨暘時若非
特吏逃其責而神亦廟食無愧尚享

謁社稷祝文

汪彥章

國家當艱難用武之秋擇循良宣化之吏不以某之不肖使守此邦撫其人民而事其社稷大懼迂愚無以報稱惟神降釐下土秩祀萬世使雨暘以時疾癘不作而守亦與有榮焉尚享

謁廟祝文

竹隱畸士

天子不以某為愚付之以八州二十縣之甿臨遣於朝使長治之凡人之所蒙恃以福吏之所仰而受賜者皆當蚤夜奉祀以為民休視事之始敢不敬見

謁廟祝文

竹隱畸士

某被命於朝來守茲土仰惟前烈遺愛具存平生所貴師其在今日雖則不敏敢不夙夜蒞事之始神其鑒之

謁諸廟祝文

趙德莊

凡天下郡邑帝以神而君以吏非使之食斯土咸以為民也然神嘗聰明正直而吏不能皆賢故民欽事神久而益信而有時乎患苦吏之不速去也某不佞不能賢何以使民不患苦而欲去哉神尚寔相之尚饗

謁城隍廟祝文

葛謙白

某承乏守土惟城是依使城之無虞惟神是賴則蒞政之始其敢怠於神而不以告乎尚饗

謁東嶽廟文

秦少游

惟神望秩岱宗實掌郡岳有嚴別廟在於此邦守土之臣既見民利敢羞牲酒進獻於庭

謁城隍廟祝文

秦少游

淮西古城形若垂瓠帶以汝水生齒實繁惟神廟食此

土芘貺一方敢致酒牲用嚴薦見躬趨於庭疇敢後時

經過威惠廟祝文

黃泰之

某去臘之官便道款謁今叨召命復出祠下自往而還
由老及幼莫不席芘休而沐潤澤酌酒薦牲誠未足以
荅靈貺之萬一軌之於無虞翼之於有成惟王寔宏茲賜

辭廟祝文

竹隱畸士

某承乏守土適及期年政也無良而歲則大有獲免罪
戾神實賜之蒙恩還朝其敢不告

辭平江廟祝文

某守茲南土賦政不優沐神之澤日蒙其休茲緣申命
摠計外司去此有日祇見神祠

辭諸廟祝文

趙德莊

某猥以政學於茲三年行實不修俗弊而莫之化也財
用不充民貧而莫之緩也水旱流行有以為神羞而牲
酒瘠酸無以為神報也不罪不疾登茲解歸敢不重拜

辭廟祝文

趙德莊

行義不振無以事神以病丐閒歸老丘壑某不肖之責
粗塞而人之仰神無窮尚俾斯民永依正直

辭靈著王祝文

黃泰之

惟王功蓋一世澤流萬代凡厥生人舉蒙休苾某承乏
此邦睇遺像而邇靈光禱祈必應捷於影響凡安于身
昌於家善於其政皆王之賜也其行也敢不以告

辭諸廟祝文

竹隱畸士

某承乏守土於茲累年賴神之休穀麥累稔寇虜不作

民用樂康今復蒙恩更命於魏凡平昔耳目所接尚猶未懷也况於承庇之久而受賜之多者與恭造祠宇惟用敬告

辭廟祝文

竹隱畸士

某承乏於此八年疆場宴安年穀和熟繫神之力獲免於戾奉被詔旨護河以東屬當有行敢不恭告

祭謁先聖先賢

祭舜祠祝文

張敬夫

某謹以牲醴致祭於虞帝之祠惟斯民之所以生斯世之所以立繫人倫之教是賴而聖人實人倫之至也帝之盛德冠冕萬代固豈下臣所敢贊述蒼梧之野謂帝嘗臨寅緣此邦獲奉廟祀某蒞官之初適修常事周視棟宇缺壞弗稱悚栗汗下不敢遑寧肇新規模茲焉獲考敬率官僚俯伏以告惟帝之澤化育並行動植蒙賴何有窮極敢云此邦獨私其賜

祭有虞氏二妃祝文

張敬夫

惟神唐帝之女嬪於有虞協德聖神垂則萬代新宮肇建
內閭是嚴修祠於春敢率彝典

祭蜀漢昭烈帝祝文

張敬夫

惟帝痛宗國之荒墜憤仇賊之憑陵顛沛百罹信義不舍
至於賢哲願為之佐英雄樂効其死規模宏遠夫豈偶然
天若祚漢豈其無成雖曰不終正理曷泯眷言茲地昔所
遲回風烈猶存焄蒿悽愴有廟以祀典禮則宜藩臣經從
敢不修敬

謁嚴子陵祝文

張敬夫

某以愚陋被命來守此邦竊仰先生高風於千載之上
視事之始恨拘印綬不得躬走祠下敬遣某官往致一
奠

祭寇忠愍公祝文

張敬夫

丞相萊國寇忠愍公國有大議發言盈庭紛紛鄙夫感
縮經營豈國之愛惟謀厥身從違之間興喪所分不有
英哲孰相其成一言之決九鼎莫傾久矣萊公社稷之

臣定計澶淵功垂日星匪功之艱其見克明惟見之獨
勇莫敢櫻黃蓋一張虜膽已醒是曰廟勝豈幸之云彼
纖雖巧寧屈其伸是非之公久焉蓋新蕞爾茲邑公所
嘗臨民之愛公孔悲以忱有剪者竹為之發生我來拜
公起而涕零才難道遠孰起九原何以昭之不在斯文

謁三公堂祝文

張敬夫

敢昭告於諫議田公文正范公清獻趙公某被命來守
此邦稽諸圖牒惟三公之遺風流澤在焉高山仰止拳

拳此心敢不自勉庶幾萬一視事之始敬薦薄奠

謁故侍中太尉長沙陶威公文 朱元晦

某猥承人乏假守此邦祇事之初以禮見於先聖先師而視其學則有公之遺祠在焉惟公忠順勤勞機神明鑑歿而不朽食此江墳其亦有以相之使民安于下官給於上而某也蚤得收其疾病之軀以幸免婆婆之歎則公之賜大歟謁之初敬以誠告

謁元祐禮部尚書李公文

朱元晦

仰惟壯節高風夙所欽慕敢不再拜伏謁以致其高山景行之思惟公之靈尚克臨鑒謹告

謁濂溪先生祝文

朱元晦

敢昭告於故知軍事濂溪先生周公惟先生道學淵懿得傳於天上繼孔顏下啟程氏使當世學者得見聖賢於千載之上如聞其聲如覩其容授受服行措諸事業傳之永久而不失其正其功烈之盛蓋自孟氏以來未始有也某欽誦遺編敬啟蒙吝茲焉試郡又得嗣守條

教於百有餘年之後是用式嚴貌像作廟學宮并以明
道先生程公伊川先生程公配伸從享惟先生之靈實
鑒之

謁韓文公祝文

葛謙白

公以勁節忠操為唐名臣由刑部侍郎貶潮州移袁祭
神之章告至之表載在方冊讀者竦然頃者備數貳卿
以罪去國天子不終棄俾守茲土視印之始其敢不拱
拜祠下尚饗

謁狄仁傑廟祝文

秦少游

惟公昔以盛德為唐名臣嘗刺此州風流具存越王之禍玉石俱焚二千餘人賴公獲免宜千萬年血食茲土豫之子孫報仰何窮舊祠迫隘不稱明靈爰築新室以安貌像敢涓時日薦告於庭

謁李愬廟祝文

秦少游

唐之中葉盜據此方歲行四宮天誅不訖公時銜命實帥西師北破姦巢市不易肆虵豕遺種化為平民于安秦

人厥功懋矣廟食雖久棟宇穿頽易而新之得是亢奭
千秋萬歲公其安焉

辭昌黎伯祝文

黃泰之

惟潮為海濱之鄒魯惟公為潮人之夫子驅除異物用
蕃厥生矯揉陋習挈之禮樂庶而教之功至於今不泯
也某備員此邦惟流風餘澤是承朝廷不以其不才而
賜之收召寧非陰有以扶掖之邪酌酒祠庭再拜歸貺願
公卒惠相

祭饗

春賽祝文

汪彥章

國之大事在祀為先雨露既濡仲春在候率循常典徧於羣神惟神之靈功在社稷用涓吉日祇薦庶羞冀闡鴻秋俾民受福雨暘順序不違農時指日秋成報其敢後

秋賽祝文

汪彥章

國事之大祀典為先有德在民稱情立禮霜露始降律

惟仲秋歲有常儀敢忘歸報惟神廟食是土恃民為尊
民社既安神祠亦永秋成在望雨暘失時冀顯靈通以
福黎庶

秋祭諸廟祝文

汪彥章

提封千里維民所止神實庇焉春秋匪懈享祀不忒吏
實主焉况夫典禮首戒祀事式遵走羣司以致誠哀百
靈而時對蓋將有禱於上下神祇矣今三秋載戢載肅
萬寶將成精意以享必潔必豐諒應其求者必在乎冥

冥之中恭惟明神血食廟社亦既有年斯民奉祀久而
益謹巫祝所告神其鑒之尚享

省祀祝文

崔德符

惟神有德有功惟國有祈有報著在甲令率為舊章時
維仲秋歲修祀事犧牲肥碩籩豆靜嘉神其居歆庶無
罪悔

祭勾芒神祝文

日窮於次歲事肇興爰卜土牛以送寒氣惟神佐成震

治於民有功爰稽禮經用修常祀

秋祭祝文

張敬夫

茲以素秋恪修常事在禮所當報而不祈惟是仲秋以來久愆雨澤今稻之傷者雖不及事然土壤堅燥澤氣不升實豫懷嗣歲之慮敢因以請早賜甘澤兆開豐穰實惟神之休

社壇祝文

張敬夫

敢昭告於社稷之神某被命來守此邦政有闕謬願降

災於厥躬無以疵癘於斯民惟明神實照臨之

社壇祝文

張敬夫

惟雨暘寒燠之時與不時雖司乎神而實係於人之為
其以不敏來守此邦懼知慮有所弗逮惟神寬之至其
自作之愆則愿降罰於身而無以傷乎民則惟神之明

祭稷神祝文

張敬夫

惟稷有神司我下土幹旋生育功用莫禦

楚望祭名山大川祝文

張敬夫

名山大川神靈莫測望祀之典敢不敬恭肇始二壇用
伸祈報惟神歆格佑我下民俾雨暘時若歲事登濟罔
有菑害以闡神之休惟吏謹當率民奉事自今以往終
古無斁

祭烏龍山神祝文

張敬夫

竊惟古者諸侯各祭境內之山川嚴其壇壝潔其幣牲
以致吾誠焉耳後世立之棟宇設為象貌其失甚矣仁
安之山實鎮茲土風雲變化雨我百穀是惟神靈民所

倚賴而禱祀之所曠然未講其何以收聚誠意克有感
通肇始茲壇亦既訖事謹率僚屬再拜以祀惟神昭相
俾雨暘以時嘉生無癘吏雖不敏敢不率民敬事永以
無替亦惟神之休

祭勾芒神祝文

張敬夫

惟時新春陽氣肇舒乃出土牛以首農事致祀於神寔
曰彛典惟神孚佑時其雨暘順乃嘉生賜以豐年其敢
忘神之德

祭海陽山祝文

張敬夫

嗚呼海陽之山呼吸雲氣維邦之望而民所恃嗟嗟晚稼亦既成穗屬時驕陽垂成莫遂惟神至仁矜此憔悴觸石膚寸一境是庇沛為甘澤成我豐歲孚於下民永答神惠

祭諸廟祝文

惟茲稼穡幸底有年戴神之休敢忘思報謹以季秋聿修常事惟神鑒臨終惠賜之

祭灤江堯山祝文

在禮諸侯得祭其境內之山川惟山川之靈能出雲雨故為禱祀之所依堯山灤江此邦之望也而壇壝未立脩敬無所茲以夏秋之交近旬不雨農夫望歲之切用敢瞻望再拜以致悃誠具遣官僚奉祀以告伏惟神靈惠敷沛為甘澤俾克有年圖報之脩其敢復後

秋祭堯山祝文

張敬夫

茲以季秋萬寶告成謹遣官僚敬修常事仰惟神靈賜

以鑒格

祭北岳祝文

竹隱畸士

節屆長羸時當化養萬彙繁祉百嘉阜亨祇薦豐盛敬
脩常祀維帝秉德奠茲朔方冀臻潤澤之調懋相恢台
之序庸有昭報敢忘吉蠲

祭北岳諸神祝文

天以神筮寶玉付畀皇帝用祇粟不敢寧康躬臨會朝
膺受顯命推美弗有歸功百神深詔有司肅致明祀惟

帝祚國協於休祥敬脩苾芬祇報靈佑益茂厥福用永相於皇家

春祈諸廟祝文

三時務農四日舉趾於彼新田以我覃耜神其格思民則勞止如茨如梁為酒為醴迄用康年奄觀銍艾

秋報諸廟祝文

秋既成矣穀既登矣民得以寧其父子而吏得以豐其棗盛者皆沛之休也敬再拜受賜

視社祝文

朱元晦

叨被恩除假守茲土載惟社稷民命所依祗率故常按
行封壇用嚴國典式對神庥謹告

夏祈北岳祝文

竹隱畸士

惟帝宅此冀方惠于朔土威德之溥人民俱依吏祗厥
常祭弗敢怠在夏曰假於時為亨敬脩嘉粟之誠用介
長羸之祉

秋祭祝文

日者天子閔仁元元申嚴賞誅購捕螟螣郡縣協恭吏民趨令除治勦絕既無了遺矣今秋既垂成稻將畢刈夫人張頤以俟粒食乃聞遺種復煽淮右是用憂栗悼懼不遑寧居謹防官屬躬奠幣於祠下惟神威及庶物惠流一方指顧蟬呻可攝妖孽願資陰德之靈以扞吾民之患功宜有報吏不敢忘

祭城隍廟祝文

黃泰之

惟神血食茲土垂芘一方物無疵癘民用寧謐凡牧民

之吏弗瘵厥職亦惟扶持安全之賜也某備員郡事半
載奉神之禮缺焉若踈至於體神之意以惠恤疲忙剔
除弊事朝夕誠不敢少怠今茲甘雨時若年穀兆豐非
神之澤而誰為迺若海寇授首官軍奏勲垂敗而成幾
危而捷寧非威靈所暨乎酌酒薦牲聊以鼓舞乎神之
賜惟神其終惠之

秋報北岳諸神祝文

竹隱畸士

惟民終歲勤動以俟有秋乃克粒食今雨暘時若百穀

順成欽神之休不敢違處祇率禮典肆用昭報

祭河祝文

四瀆之大以河為宗古之諸侯祭不越境今以旱暵之
故禱於羣神吏罪其多雨不時降意者非名山大川能
出雲雨以澤下民者疇克救之瀛之為州在河之涘禮
實可祭義不為諂守郡之寄不獲以躬謹遣上佐具嚴
祀事冀惟一勺之潤以蘇千里之民

祭江祝文

汪彥章

惟神以海為宗王百谷也電霧風雷氣停蓄也曰雨曰
暘相民欲也鞭笞羣龍起潛伏也方春敷榮俟嘉沐也
胡為陰陽戾盈縮也冰漸既融潮未復也戢然千艘尾
銜屬也聖人中天世司牧也一夫阻饑為噸感也貌貅
萬屯懼枵腹也神寧忍予倦揮沃也虛呵起難費升甬
也詔恩臨祠奉牲玉也尚丘雲師貺霑足也繫邦是圖
匪私瀆也

迎神祈年祝文

竹隱畸士

金史卷之八十四
卷八十四
維仲之春既播厥穀雖具宣於民力寔仰繫於天時苟
風雨之具調庶茨京之可待神將有報吏不敢忘

立春祭勾芒神祝文

方春載陽土脉適發耕者將作既戒乃事維神司木寔
佑我民恭薦嘉牲以介靈佑

立春祭勾芒神祝文

方歲之春俶載南畝惟爾有神相我稼事既敬既戒神
其佑之

獲管賊祭廟祝文

秦少游

乃者羣盜竊發剽劫閭里游魂疆場境內騷然賴神威
靈咸伏其辜鯨鯢既殲民以休靖敢以牲酒用答神庥
興脩祭告

告成堯山灘江壇祝文

張敬夫

惟江山之神寔為此邦之所瞻依而壇壝禱祀無所其
用是懼爰度高明之地肇新規模及茲而成謹率官寮
俯伏以告惟孚鑒佑庇下民俾歲屢豐物無疢癘吏當

率民敬事其永無斁

立嚴子陵祠祝文

竊惟此邦之所以重於天下者以先生高風之所存也
雖舊隱之地祠像具設而學宮之中烝嘗獨曠其何以
慰學士大夫之思乃關東偏肇始祀事嗟乎世遠道散
寵利相希而事君之義益以不明惟先生曾不以一毫
動其中啟世祖貴德尊士之心成東京砥節礪行之俗
流澤遠矣繫我多士克承繹之

立三公祠祝文

某敬即良辰遷祠茲宇而肇祀嚴先生於東偏二司圮
然相望百世之下知所景慕矣惟廣平宋公亦嘗來牧
今求遺像欲列為四公而未獲也敢先以此告

上梁祭土地祝文

晁旣咎

某自郊坳改宅邑廛既告於神矣以日之吉架梁於其
宇不遠之復自其素心將休老此境尚克永康以裕其
子孫方久事神惟神其祐之

脩城祭土地祝文

曾子固

州有帝命繕治城墉得日之良嘯工始事斯人永賴維爾土神尚其降休敢不以告

開西湖告廟祝文

蘇子瞻

杭之西湖如人之有目湖生芟葑如目之有翳翳久不治目亦將廢河渠有膠舟之苦鱗介失解網之惠六池化為智井而千頃無復豐歲矣是用因賑之餘資興開鑿之利勢百日奏功所患者淫雨千夫在野所憂者疾

癘庶神明之陰相與人謀而協濟魚龍前導以破堅拔葦
解折而迎銳復有唐之舊觀盡四山而為際澤斯民於
無窮宜事神之益勵我將大合樂以為報豈徒用樽酒
之薄祭也

脩城祭城隍祝文

築城大役官吏暴露歲月滋勤役愆於素窘以陰雨穴
以蛇鼠成者或隳致力無所城以保民寔神之職寧忍
視此不施以德驅此陰沴廓以晴曦為城害者揮而去

之母重勞人版築者程工堅固無或後艱一成不傾惠
自神賜功由神助官吏與民敢忘恭事

重脩北山趙侯廟祝文

趙德莊

越人尚鬼而信巫巫益誕鬼益淫則金錢爭趨棟宇翼
如有若神之聰明正直不驚動禍福之則廟像圯然而
不顧神能容而安之神之所以為神也與茲以辰良欽
以丹堊以奉神之賢以示民之正以毋隳天子之命祀
敢告

脩造祭告祝文

鳩工有俶庀事惟寅具嚴涓日之良用謹前期之告仰
惟昭假俯賜鑒知

習是齋祭齋牌祝文

黃泰之

齋牌有祭其來舊矣以祭為不足信耶則祓禳之說無
據以祭為足信耶進脩之效無取吾齋固無俟乎祓禳
也而亦未嘗嗇於進脩惟神其勇相之

祈雨

祈雨祝文

張欽夫

春且盡矣民將蒔田而時雨少靳土膏不滋歲事所係甚重是用奔走控告神明伏惟矜憐沛而甘澤周徧浹洽克濟南畝寔惟神休吏之不恭敢不循省

祈雨祝文

服嶺以南土剛而農情夏秋之交數日不雨已或告病求神雖瀆理不容緩伏惟矜惠下民蚤沛甘澤周及四境俾克大濟豐年之報敢不敬脩

祈雨祝文

惟今之歲賴神之休早禾既獲矣而彌旬不雨禾之晚者秀而未寔一簣之功正在茲日是用奔走控告沛澤之賜惟神終惠之

祈雨祝文

惟茲晚稼既視其生長以至于今亦且穗矣必待一雨之沛而後成實乃或靳焉害于垂成惟神之仁獨不矜此豈人事有以干陰陽之和與政有不平刑有不中驕

怠之或萌寔長民者之責惟民之寡弱獨何與此盍降
罰於吏無苦其民今茲一日不雨則有一日之傷事
既迫矣號呼于神惟神其哀念之

祈雨祝文

汪彥章

常暘從夏酷毒異常庚伏既終秋後竒暑旱魃為虐農
人是憂日望雲霓以蘓南畝承流之寄敢怠懇祈潤澤
焦枯亦神之職惟神聰明正直依人伏願咳唾雲雷散
施膏澤秋成不日疵癘潛消稼穡豐登公私並濟吏寬

其責神亦何羞儻神有靈烏敢忘私

祈雨祝文

崔德符

自冬徂夏七月不雨困蘊隆也斬其駕鶩囚其蜥蜴號
青童也商羊不舞執狢將見召螟蟲也涸水出精禿妓
呈怪歲且凶也南北萬里孰塞湘穴而泥江楓也得大
摠持役使鬼神無不空也維神之隅峯嶺雜沓駭龍嶽
也太山之頤百泉所橐龍所宮也挹彼注茲迺其餘波
乞靈於龍也綵輿寶鉞萬首相差戴而東也層幢累幡

摩霄擾雲飄緋紅也僊歌佛曲啁轟嘈噤亂鼓鍾也將
迎奔走丁壯婦女洎姑翁也足靴手板膺喘背汗吏歸
窮也駢揖羅拜首下投杵而腰彎弓也我方下帷側脇
而寐休病瘡也不隨父老俯伏塵土愧形於容也乃夢
道士素衣烏襪而揭簡於胸也寢門之左挺然植立闕
扉乃逢也縹紙堊書經云龍樹其別我聾也矍然而興
擎拳作禮以致吾恭也龍其馳驅并翳而號令豐隆也
禾麻菽麥黍稷稻粱將再見其芄芄也載芟載穫娣姒

歡呼簸且春也四民一飽神不乏祀徭賦得以供也牲
牢肥碩俎其肩尻以報龍功也

祈雨請水祝文

歲既薦饑春仍不雨禱於羣神靡愛牲幣休應雖格膏
澤未周欽聞名山大庇茲土有答如響無感弗通用涓
穀辰遠致誠請為七日之期以勺盈尺之潤當具顯烈
請命於朝不惟吏民膺受多福而神之潛德自是而彰
聞顧不偉歟

祈雨祝文

東南之利杭稻是資畚鍤布以雲興溝澮分而綺錯泉
流不竭膏澤以時庶幾有秋可以無事方茲徂暑乃復
亢陽大雲蔚以峯竒田背枯而龜坼惟民與吏悼心失
圖感額興嗟搏手無計念慘舒之所係惟變化之所司
俯瀝懇誠仰祈昭鑒沛然一雨以洗羣憂

祈雨祝文

歲既薦饑春仍不雨人心凜凜望在朝夕陰雖積而陽

未和雲已密而風驟至意者吏有大罪無以媚於神神不得而赦之歟雖然赤子將隕於溝中非神其孰能拯之也恐懼呼嗟以黷神聽惟神其念之

祈雨祝文

維吏無善狀以干致治之和故民有凶年罹此旱暵之虐閱三時而不雨盡四月以無雷祇騰煙火之雲但鬱塵沙之霧草萎地赤木槁山頽萬室皆空四民相食內外震虢靡所依投是用載講僊科爰陳醮席仰天闔而

請命望霄漢以敷誠伏冀曲軫天慈興哀下土大誅旱
母黑雲無干日之祥盡起毒龍白雨見蔽山而下沛然
三日活此一方

祈雨請龍祝文

潭洞阻絕靈君所宅簸弄明月司是霽驛若歲乾早有
請必獲風馬雲車從以霹靂一穗之香三日之澤民不
敢忘不億不逆其來孔昭其去則賸僊兮仲兮莫我而
測戊申閔雨上意斯赫蒙福京師先此疆場迎之致敬

里數十百蛇蛻魚服惠然我即願幹元氣崑崙旁礪散
為甘霖洗此炎爍高黍下稊晚稔蚤植均被沾溉葦葦
蕪蕪痔乃錢鑄是刈是穡是登是納倉廩維億潛躍自
如寧有德色鏡鼓寅餞自古在昔

請太湖山聖懺祈雨祝文

竹隱畸士

善救之恩初無遠邇由衷之懇豈隔微賤焦然枯槁之
民仰止慈悲之宇投誠而請跂立以須伏願至感旁通
深仁默應龍神受命隨旆影以俱來雲雨奏功滿農心

而各足

祈雨祝文

江湖之左皆灌溉之田黠歛之間多仰高之地山林水
淺土瘠民勞雨纔曠於浹旬食頗憂於終歲丐求餘潤
謁歎諸祠惟神宅據幽遐職司變化飛天潛地固恍惚
以難名喚雨吹風宜湏臾而可致冀蒙霈渥以解怨
咨

祈雨請聖水祝文

乃者以旱乾之憂乞靈於神使者出郭雨乃驟至是神
之有大惠於斯人也今稻不入土螟螣將興民待一雨
以蘓溝壑之命謹遣官屬赴愬祠下願為七日之期以
申前約休應昭格其敢食言當聞於朝以請爵命之寵
惟神其幸聽之



五百家播芳大全文粹卷八十四